

ՊԱՏԱՆԱԳՐԱՆԱԽԻՐԱԿԱՆ

ՎԵՐԱ ՍԱՀՄԱԿԵԱՆ

ՉՈՐՔ-ՄԱՐԳՈՒԱՆԻ ՈՒԽՏԱՎԱՅՐԵՐԻ ԱՆՈՒԱՆ ԵՒ ԳՏՆՈՒԵԼՈՒ ՎԱՅՐԵՐԻ ՇՈՒՐՋ

Չորք-Մարգուան¹ բերդաքաղաքը գտնուում է Կիլիկիայի ճկեր գաւառում: Հայաշատ այս վայրի մասին կարելու տեղեկություններ կան Հայր Առնոյ Ալիշանի «Միսուան» ստուարահատոր աշխատութեան մէջ:

Ղ. Ալիշանը, ուսումնասիրելով ճամփորդական գրութիւններ եւ պատմական կարելուութիւն ներկայացնող փաստաթղթեր, արժէքաւոր տեղեկություններ է հաղորդում գաւառի ամրոցների, բերդերի, բերդաքաղաքների, բնակչութեան թուաքանակի եւ այլ մանրամասների մասին:

Լեւոն Մեծագործ թագաւորի՝ 1216 թ. ապրիլի 23-ին Տարսուում տուած գրաւագրի համաձայն՝ Կիլիկեան Հայաստանի թագաւորը, երկու տարուայ պայմանաժամկետով, ճկեր գաւառը՝ իր տասը բնակավայրերով (տասն տեղիք, զօրս նոցին սարօք՝ եւ ի նմին գաւառի) յանձնում է Հիվանդախնամ ասպետներին՝ դրա դիմաց ստանալով քսան հազար սառակինեան բիւզանդ, որը պէտք է յանձնէր իբրեւ պաշտատական (օժիտ) իր Ռիտայ անունով դստեր ամուսնութեան համար²:

Ղ. Ալիշանի բերած տեղեկությունների համաձայն՝ Չորք-Մարգուան տեղանունը Էուկ-մարգեպան ձեւով յիշատակում է վերը նշուած տասը բնակա-

1 Դյորդ-Եոյ, Տօրթեոյ, Դորտ-Եոյ, Ճուկ Մարգպան, Չորք-Մերգմն, Ճուկ Մերգմն. Ճուկ Մարգպան, Չորք-Մարգպա, Չորք-Մարգպան, Չորք-Մարգպանք, Չորք-Մարգուան, Չորք-Մարգուանք, Ումրանիյէ, արեւմտահայերէն՝ Տօրթեօ գիւղաքաղաքը գտնուում է Կիլիկիայում՝ Աղանայ նահանգում, Սեւ լեռների փեշերին, Դելի չայ կոչուող գետի մօտ, Բինարես լեռան ստորոտին: Բնակավայրը թուրքական աղբիւրներում յիշատակում է Դյորթեօ ձեւով՝ քաղաքը չորս մասի բաժանող քառուղին նկատի առնելով: 1910 թ., ի թիւս այլ հայկական բնակավայրերի, Չորք Մարգուանը եւս կրում է անուանական փոփոխութիւն՝ դառնալով Ումրանիյէ: Սակայն, քանի որ Սիրիա նահանգում եւս կար նոյնանուն մի բնակավայր, փոստային գործերում առաջանում էին դժուարութիւններ: 1912 թ. բնակավայրը վերանուանում է Դեօրթեօ: Ներկայումս գտնուում է Թուրքիայի Հանրապետութեան Հայթայ նահանգում:

2 Տե՛ս Վ. Մ. Ալիշան, Միսուան, Համագրութիւն հայկական Կիլիկիոյ եւ Լեւոն Մեծագործ, Վենետիկ, Ս. Ղազար, 1885, էջ 411:

վայրերի շարքում³, ընդ որում, Էուկ-մարգեպան բերդաքաղաքում հայ բնակչության թիվը 150 տուն էր, նրան յարակից Օջաքում⁴ 150, իսկ Էօզերլիում (Էիւզլեր)⁵ 120⁴:

Հայկական այս երեք բնակավայրերը օսմանեան շրջանում մաս են կազմել Ադանայի գաւառի⁵ (սանջաք) Չորք-Մարգուան գաւառակի (կազա), որը աւելի ուշ վերանուանում է նախ Ումրանիյէ, ապա՝ Դէորթեօլ:

Բացի Աիշանից, այս բնակավայրի վերաբերեալ կարեւոր տեղեկություններ են փոխանցել նաեւ Սմբատ Գունդատաբլը, Վիլլերբանդտ լատին եպիսկոպոսը՝ պատմագրական յուշերի մէջ:

Ինչ վերաբերում է Չորք-Մարգուանի հայկական եկեղեցիներին եւ դրանց կառուցման թուականներին, պատմագրութեան փոխանցած տեղեկությունները բաւական ժլատ են: Աւելին՝ գիտական ուսումնասիրություններ կամ պեղումներ այստեղ երբեւէ չեն իրականացուել:

Հայասկան այս բնակավայրի վերաբերեալ ցայսօր ունենք երկու տպագիր յուշագրութիւն. Մինաս Խապրիկի «Եթէ Չորք-մարգպանը ինծի հետ խօսէր...» (Պէյրութ, 1983 թ.), եւ Մինաս Գոճայեանի «Պատմութիւն Չորք-մարգպանի, (Տօրթեօլ) գիւղաքաղաք մը Կիլիկիոյ մէջ» (Լոս Անճելըս, 2006 թ.) գրքերը: Մնացեալ աղբիւրները թռուցիկ են անդրադառնում Չորք-Մարգուանի եկեղեցիներին՝ հաղորդելով կցկտուր, երբեմն էլ ոչ ճիշտ տեղեկություններ: Դրանցից մէկն օրինակ՝ Ս. Մ. Ծոցիկեանի «Արեւմտահայ աշխարհ» ուսումնասիրութիւնն է: Գրքում հեղինակը գրում է, որ Չորք-Մարգուանը ունեցել է երկու եկեղեցի՝ մէկը Հայաստանեայց Առաքելական, միւսը՝ Աւետարանական⁶:

Ծանօթանալով բնիկ չորք-մարգուանցի, Քելեկեան որբանոցի շէնքերից մէկի յատակագծի հեղինակ Սամուէլ Պոռանեանի շուրջ 500 էջանոց անտիպ յուշագրութեան հետ՝ նկատեցինք, որ մի շարք հարցերում, տպագրուած աղբիւրների հետ համեմատած, կան անհամապատասխանություններ: Սոյն յօդուածի շրջանակում արուած ուսումնասիրութեան արդիւնքում ձեռք բերեցինք եւս մէկ ձեռագիր, որի հեղինակին, ցաւօք, չկարողացանք պարզել:

Մեր ձեռքի տակ են նաեւ 1905-1909 թթ. Ադանայի առաջնորդ Մուշեղ Ծ. վրդ. Սերոբեանի ինքնակենսագրութիւնից մի քանի թուայնացուած էջեր, որոնք եւս անտիպ են:

3 Տե՛ս անդ:

4 Տե՛ս անդ:

5 Ադանայի գաւառներն են՝ Մէրսին, Զերեյ Բերքեթ, Կոզան, Իչ-իլ: Այս գաւառում եղել է 15 գաւառակ, 21 գիւղախումբ, 1632 գիւղ, 25 եկեղեցի. տե՛ս «Ընդարձակ տարեցոյց Ազգային հիւանդանոցի», Կ. Պոլիս, 1901, էջ 366:

6 Տե՛ս Ս. Մ. Ծոցիկեան, Արեւմտահայ աշխարհ, Նիւ Եորք, 1947, էջ 737-738:

Վստահ ենք, որ ձեռագիր մատենաներում նույնպես ներկայացված պետք է լինեն սրբավայրերի մասին հետաքրքիր յիշատակումներ, որոնք երբեմն երեւան գալով՝ նոր լոյս կսփռեն տարածաշրջանի հոգեւոր կեանքի եւ եկեղեցաշինութեան վրայ:

Աւելի քան համոզուած ենք, որ հայաբնակ այս վայրերի գիտական ուսումնասիրություններն ու պեղումները երեւան պետք է հանեն պատմագրութեան համար կարեւոր ու բացառիկ տեղեկություններ, քանի որ, ինչպես վկայում են այստեղ ապրած հայերը, այս վայրերում հայկական անցեալի հետքերը ամէնուր են: Այս առիթով Սամուէլ Պոռանեան յուշագիրը գրում է. «Այստեղ հայոց պատմութեան հետքերը սպասում են իրենց լուսաբանմանը: Նման ենթադրութեան ենք հակուել Զաբէլ թագուիոյ պարտեզում, որը ներկայումս ծառայում է իբրեւ թուրքական գերեզմանատուն, թաղման արարողութեան ընթացքում երեւան ելած երկու սափոր արծաթ դրամների պարագայի հիման վրա: Առաջինը Լեւոն Բ.-ի, իսկ երկրորդը՝ Հեթում Ա.-ի արծաթ դրամներով լեցուն է»⁷: Իսկ Թեոդիկի փոխանցած տեղեկությունների համաձայն՝ 1873 թ. մի քուրդ բոլորովին պատահաբար գտնում է նաեւ Լեւոն Ե. թագաւորի սուրը⁸:

Յայտնի է, որ Օսմանեան տիրապետութեան շրջանում եկեղեցիների կառուցման համար հարկաւոր էր ստանալ թոյլտւութիւն՝ ֆերման (հրովարտակ)⁹: Չորք-Մարգուանում կառուցուած եկեղեցու՝ Ս. Աստուածածնի վերաբերեալ Մինաս Գոճայեանը գրում է, որ այն ունեցել է մեծ գմբէթ, եւ հաւելում՝ Դէօթեօլի երեւելիները մեծ ջանքեր են թափել հրովարտակ ստանալու եւ գմբէթարդ եկեղեցի կառուցելու համար¹⁰: Միւս աղբիւրները, որոնք գրի են առնուել աւելի վաղ, Ս. Աստուածածին եկեղեցու վերաբերեալ նման տեղեկություններ չեն հաղորդում:

Հեղինակի ներկայացրած մանրամասնությունները մեզ ստիպեցին ուշադրութիւն դարձնել վերոնշեալ եկեղեցու կառուցման համար արձակուած հրովարտակին՝ գտնելու այլ տեղեկություններ եւս:

Իբրեւ կանոն, հրովարտակի օրինակներից մէկը պահուում էր այն անձի մօտ, ում տրուում էր, իսկ միւսը՝ պետական պահոցում: Նման փաստաթղթեր

7 Տե՛ս Սամուէլ Պոռանեան, Յուշագրութիւն Ճուկ Մարգեպանի, Լենինական, 1965, անտիպ, էջ 144:

8 Տե՛ս Թեոդիկ, Ամենուն Տարեցոյցը, Կ. Պոլիս, 1905, էջ 49:

9 Ըստ Կ. Պոլսոյ հայոց պատրիարքարանի կողմից Թուրքիայի արդարադատութեան եւ դաւանանքների նախարարութեանը ներկայացուած հայկական եկեղեցիների եւ վանքերի ցուցակներում ու թաքրիքներում (ծանուցագիր) արուած նշումների՝ Օսմանեան կայսրութեան եկեղեցիները բաժանուել են երկու մասի՝ ֆերմանով հաստատուած եւ առանց ֆերմանի: Ցուցակների մասին մանրամասն տե՛ս «Էջմիածին» ամսագրի 1965-66 թթ. համարներում՝ Ա. Սաֆրաստեանի յօդուածներում:

10 Տե՛ս Մինաս Գոճայեան, Պատմութիւն Չորք-Մարգպանի, (Տօրթ-Եոլ) գիւղաքաղաք մը Կիլիկիոյ մէջ, Լոս Անճելըս, 2006, էջ 143:

ներկայումս պահում են Վարչապետության Օսմանեան եւ Հանրապետական արխիւներում (Başbakanlık Osmanlı Arşivi, Başbakanlık Cumhuriyet Arşivi): Ոչ քրիստոնեայ բնակչութեանը վերաբերող եկեղեցական որոշումներ եւ կարելի տեղեկութիւններ են ամփոփուած նաեւ եկեղեցական մատեաններում (kilise defterleri), որոնցում վկայութիւններ կան սրբավայրերի կառուցման եւ վերանորոգման, դրանց առընթեր դպրոցների փակման կամ բացման, հոգեւորականների նշանակման, եկեղեցական հարկերի, տուրքերի վերաբերեալ: Նման հրովարտակների օրինակներ պահում են նաեւ Երեւանի Մաշտոցի անուան Մատենադարանում, սակայն այստեղ եւս Չորք-Մարգուանի վերաբերեալ գրութիւններ չկան:

Վերը նշուած միւս պահոցները փակ են հայ ուսումնասիրողների առջեւ, հետեւաբար՝ առայժմ անմատչելի:

Առաջնորդուելով բազմավաստակ Ա. Սաֆրաստեանի՝ «Էջմիածին» ամսագրում տպագրած եկեղեցիների, վանքերի թեզերէներէի (պաշտօնական գրութիւն) եւ ցուցակների մասին յօդուածով՝ փորձեցինք գտնել օգտագործուած օսմաներէն փաստաթղթերի բնօրինակները: Հեղինակը դրանց գտնուելու վայրի մասին հաղորդում է հետեւեալը. «Այդ ցուցակները եւ թաքրիրները»¹¹ պահում են Երեւանի Հանրային գրադարանի թուրքերէն գրքերի շարքում՝ 1-47 համարների ներքոյ»¹²: Հաւանաբար այն ժամանակ, երբ Ա. Սաֆրաստեանը աշխատել է այս ցուցակների վրայ, դրանք պահուել են Հանրային գրադարանում, իսկ աւելի ուշ՝ տեղափոխուել, սակայն թէ ուր՝ չկարողացանք գտնել: Դրանք չկային ո՛չ Հայաստանի Ազգային գրադարանում, ո՛չ Մատենադարանում, ո՛չ էլ Ազգային արխիւում:

Մնում է գոհանալ այն իրողութեամբ, որ գոնէ տպագրուել եւ պահպանուել են նշուած փաստաթղթերի թարգմանութիւնները:

Ըստ այս փաստաթղթերի՝ Կ. Պոլսի պատրիարքարանը եկեղեցիների ու վանքերի մասին տեղեկութիւնները ստացել է նահանգների եւ քաղաքների հայոց առաջնորդներից: Այս հանգամանքը հաշուի առնելով՝ Ա. Սաֆրաստեանը համարում է, որ վանքերի եւ եկեղեցիների ցուցակները, դրանցում տեղ գտած տեղեկութիւնները ունեն պատմական ճշտութիւն՝ մասնաւորաբար կառուցման թուականների առումով¹³:

Սակայն, տուեալ վայրերում ապրած հայերի յուշագրութիւնների տեղեկութիւնները, հայ ուսումնասիրողների կազմած՝ եկեղեցիների մասին ցու-

11 شكري، Բարձրագոյն Դեանը ուղղուած պաշտօնական գրութիւն:

12 «Էջմիածին» ամսագիր, 1965, Ա., էջ 40:

13 Անդ, էջ 41:



Տոբոթեօլ, 1912 թ. Գրեքի գիւտի տօնակատարութիւն՝ Սահակ Բ. Կաթողիկոսի ներկայութեամբ



Տեորթեօլ, 1902 թ. Ազգային Կեդրոնական վարժարանի
շրջանաւարտներու վկայականաց բաշխման հանդէս



Տեորթեօլի Ս. Աստուածածին եկեղեցին

ցակները, այդ փաստաթղթերում ներառում և գրությունները յաճախ միմեանց չեն համապատասխանում¹⁴:

1995 համարը կրող՝ հիշրայի 1330 թ. փետրուարի 16-ին կազմում եկեղեցիների ցուցակի համաձայն՝ Ումրանիյե¹⁵ վարչական շրջանի Չորք-Մարգուան գիւղաքաղաքում եղել է չորս եկեղեցի:

1. Աղանայի նահանգի Ումրանիյե գաւառակի Էօզերլի գիւղում Ս. Գրիգոր Լուսաւորիչ եկեղեցի՝ կառուցում հիշրայի 1294 թ. (1877-1878):

2. Աղանայի նահանգի Ումրանիյե գաւառակի Չոքմերգէն գիւղում Ս. Աստուածածին եկեղեցի՝ կառուցում հիշրայի 1267 թ. (1851-1852):

3. Աղանայի նահանգի Ումրանիյե գաւառակի Չոքմերգէն գիւղում Ս. Գրիգոր Լուսաւորիչ եկեղեցի՝ կառուցում հիշրայի 1274 թ. (1858):

4. Աղանայի նահանգի Ումրանիյե գաւառակի Օջաքլու գիւղում Ս. Աստուածածին եկեղեցի՝ գոյություն ունի հնուց¹⁶:

Եկեղեցիների թուաքանակի վերաբերեալ Մինաս Գոճայեանը նոյնպէս գրում է, որ Չորք-Մարգուանը ունեցել է երեք եկեղեցի, որոնցից առաջինը եւ հնագոյնը գերեզմանատանը կառուցում Ս. Մինաս եկեղեցին է, յաջորդը՝ Ս. Աստուածածինը, երրորդը՝ Ս. Խաչ եկեղեցին¹⁷: Բացի այդ, հեղինակը նշում է, որ Օջաքլու գիւղը եւս ունեցել է իր եկեղեցիները, որոնք, սակայն, քանդուել են 1895 թ. համիդեան կոտորածների ընթացքում¹⁸:

Իր հերթին Սամուէլ Պոռանեանը Չորք-Մարգուանում յիշատակում է Ս. Աստուածածին եւ Ս. Փրկիչ կամ Վերին ու Վարին կոչուող եկեղեցիները¹⁹,

14 Հ. Հ. Ոսկեանի «Կիլիկիայի վանքերը» աշխատության մէջ որեւէ խօսք չկայ Աղանայի եկեղեցիների վերաբերեալ: Մաղաքիա Օրմանեանը «Հայոց եկեղեցին եւ իր պատմությունը, վարդապետությունը, վարչությունը» (Կ. Պոլիս, 1912) գրքում անդրադառնալով Կիլիկիայի աթոռին եւ ներկայացնելով Աղանայի արքեպիսկոպոսական վիճակը՝ գրում է, որ այն (Աղանայ) ընդգրկում է Աղանայ, Մերսին եւ Իշիլի գաւառները (թաղ՝ 16, եկեղեցի՝ 12, հայ՝ 30 000, կաթոլիկ՝ 1000, բողոքական՝ 200). տե՛ս էջ 207: Կ. Պոլսի պատրիարքարանի կազմած ցուցակներում վերը նշում երեք գաւառի եկեղեցիների թիւը հասնում է տասի: Ըստ «Ազգային տարեցոյցի»՝ 1901 թ. դրությամբ Աղանայի եւ Բերքթա գաւառի եկեղեցիների թիւը հասնում է 23-ի (տե՛ս «Ընդարձակ տարեցոյց Ազգային հիւանդանոցի», 1901, էջ 410), իսկ ըստ Կ. Պոլսի պատրիարքարանի ցուցակների՝ նշում գաւառների եկեղեցիների թիւը հասնում է 25-ի, որից 21-ը՝ առանց ֆերմանի, իսկ 4-ը՝ ֆերմանով հաստատուած. տե՛ս «Էջմիածին» ամսագրի նշում յօդուածները:

15 Փաստաթղթերում նշում է Ումրանիյե գաւառակ, քանի որ այդ ժամանակ արդէն Չորք-Մարգուանը հակահայկական նկատառումներով անուանափոխուել էր:

16 Մինաս Խապրիկը, ով բնիկ Օջաքլուից էր, գրում է, որ այս գիւղի միակ դժբախտությունը եկեղեցի չունենայն էր: Նորակառոյց եկեղեցին անաւարտ է մնացել, քանի որ վէճ է ծագել Պոյաճեան եւ Կէօքեան գերդաստանների միջեւ: Եկեղեցական ձեւերը բաց չթողնելու համար կառուցում է փայտե սիւններով եւ ձեղուններով տնակ. տե՛ս **Մինաս Խապրիկ**, Եթէ Չորք-մարգպանը ինձի հետ խօսէր..., Պէյրուք, 1983, էջ 50:

17 Տե՛ս **Մինաս Գոճայեան**, նշ. աշխ., էջ 142-143:

18 Անդ:

19 Տե՛ս **Սամուէլ Պոռանեան**, նշ. աշխ., էջ 146:

հաւելում նաեւ գերեզմանատանը կառուցուած՝ Ճուկ Մարգարեպանի²⁰ հնագոյն սրբավայր Ս. Սարգիս վանքի մասին²¹:

Մինաս Խապրիկը, նկարագրելով գիւղի սրբավայրերը, անդրադառնում է Ս. Աստուածածին եկեղեցուն, ինչպէս նաեւ Չորք-Մարգարեպանից մէկ կիլոմետր հեռու՝ Ամանոս լեռան ստորոտում գտնուող Խարնուպլու վանքի մասին, որտեղ աւանդութեան համաձայն՝ բնակուել է Ս. Սարգիսը²², ապա յաւելում, որ Օջաբլուի հայերը, սովորութեան համաձայն, գալիս էին Խարնուպլուի ուխտավայր եւ դիմում Ս. Մինասի բարեխօսութեանը²³:

Ընդհանրապէս Ադանայի շրջանում խարնուպ²⁴ ծառատեսակը բաւական տարածուած է եղել: Դրանցով պատուած բլուրները յիշատակում են հայերէն եղջերնուտ, իսկ թուրքերէն խարնուպլու (harnaplu) անուամբ: Ուստի, Եղջերնուտ կոչուած վայրով դժուար է յստակեցնել, թէ այս կամ այն բլրի վրայ յիշատակուող սրբավայրը որտեղ է գտնուում:

Այսպիսով՝ ակնյայտ է, որ աղբիւրներն ունեն թերութիւններ՝ մասնաւորաբար եկեղեցիների կամ ուխտավայրերի անուան եւ գտնուելու վայրերի առումով: Ս. Աստուածածին անուամբ եկեղեցին յիշատակում է Կ. Պոլսի պատրիարքարանի կազմած ցուցակներում եւ միւս երկու աղբիւրներում: Գերեզմանատանը կառուցուած մատուռի մասին եւս տեղեկութիւններ կան՝ Ս. Մինաս եւ Ս. Սարգիս²⁵ անուններով: Երկրորդ եկեղեցին, ըստ ցուցակների, կրում է Ս. Գրիգոր Լուսաւորիչ անունը, միւս երեք աղբիւրներում յիշատակում է Ս. Խաչ եւ Ս. Փրկիչ անուններով:

Բացի պատրիարքարանի ցուցակներից՝ Ս. Գրիգոր Լուսաւորիչ անուամբ եկեղեցու մասին յիշատակութեան հանդիպում ենք Մարտիրոս Տէր-Ստեփանեանի՝ 1945 թ. գրած բանաստեղծութիւններից մէկում, որի վերջին տողերում հեղինակը գրում է.

*Այո՛, մոռնալ սկսայ Ամանոսիդ շուքն հեշտին,
Կաթոտ Կապոյտն Բաօսին, եղջերէնին Մուրք Սարգսին,
Ու սիրելի դէմքերն ալ, որ հիմա հոն կը մըշին:*

20 Ս. Պոռանեանը քաղաքն անուանում է Ճուկ Մարգուան: Յղումներ անելիս նպատակայարմար գտանք գործածել հեղինակին հոգեհարազատ ձեւը:

21 Տե՛ս Սամուէլ Պոռանեան, նշ. աշխ., էջ 144-146, 235:

22 Տե՛ս Մինաս Խապրիկ, նշ. աշխ., էջ 11:

23 Տե՛ս անդ, էջ 56:

24 Խօսքը եղջերէնի կամ եղջիրենի ծառի մասին է. թուրքերէնում harnaplu կամ keçi boynuzu: Այս ծառերով շրջապատուած վայրերը տեղացի թուրքերը անուանում են խարնուպլու, իսկ հայերը՝ եղջերնուտ:

25 Տե՛ս Սամուէլ Պոռանեան, նշ. աշխ., էջ 235:

*Բայց ես մոռնալ չեմ կրնար քեզմէ ընդմիշտ երեք բան...
Եկեղեցւոյն մէր խոնարհ Լուսաւորիչն մօրուագեղ,
Նշանաձու օրրոցի, եւ մէր տունին ճամբան նեղ*²⁶...

Եթէ չլինէր այս բանաստեղծութիւնը, հեշտութեամբ կարելի էր ենթադրել, թէ պատրիարքարանի ցուցակներում Ս. Գրիգոր Լուսաւորիչ եկեղեցու յիշատակումը սխալմունքի արդիւնք է: Սակայն, կարծում ենք, չորք-մարգուանցի բանաստեղծի այս տողերը ծննդավայրի մասին պատմող բացառիկ յուշագրական շարադրանք պէտք է համարել:

Ինչ վերաբերում է պատրիարքարանի կազմած ցուցակներին, ապա դրանք յոյժ կարեւորութիւն ներկայացնելու հետ մէկտեղ ունեն նաեւ թերութիւններ, քանի որ, ինչպէս երեւում է նրանցում արուած նշումներից, մի ամբողջ շրջանի եկեղեցիների ցուցակագրումը տեսել է ընդամենը մէկ օր (սիւնակում սեւագրութեան եւ մաքրագրութեան թուականները նոյն օրն են նշուած): Յուցակներում ուխտատեղիների մասին որեւէ գրառում չկայ: Դուրս են մնացել մատուցները եւ փոքրիկ սրբատեղիները, բաց են թողնուած գրանցման ընթացքում աւերակ վանքերը, խոնարհուած եկեղեցիները, որոնք այդ ժամանակ արդէն ծառայում էին իբրեւ ուխտատեղի: Ներառուած չեն նաեւ համիդեան հրամաններով քանդուած եկեղեցիները, անուանափոխուած կամ թուրքացուած սրբավայրերը: Ինչպէս օրինակ՝ Քարաքիլիսայ (նշանակում է սեւ եկեղեցի) անուամբ սրբավայրը, որը գտնուում է Չորք-Մարգուանից երկու ժամ հեռավորութեան վրայ՝ Քարավանքի թուրքաբնակ գիւղի մօտ²⁷:

Այսպիսով, ցուցակները կազմուած լինելով Արդարադատութեան եւ դաւանանքների նախարարութեան պահանջով՝ չեն բովանդակում եկեղեցիների, վանքերի, սրբավայրերի եւ ուխտատեղիների քանակի վերաբերեալ ճշգրիտ տեղեկութիւններ: Դրանց հիմնական նպատակը ցեղասպանութեան համար տարուող նախապատրաստական աշխատանքներն են եղել, հետեւաբար ցուցակների մէջ ներառուել են բացառապէս գործող, նիւթական արժէք ներառացնող եկեղեցիները:

Ս. Աստուածածին (Չորք-Մարգուանի Վերի թաղ). Չորք-Մարգուանի յայտնի սրբավայրն է Ս. Աստուածածինը: Այս անուամբ կայ երկու եկեղեցի: Առաջինը՝ Ումրանիյէ գաւառակի Էօգերլի գիւղում, երկրորդը՝ Չորք-Մարգուանի Վերի թաղում: Էօգերլիում գտնուող եկեղեցու կառուցման թուականը պատրիարքարանի ցուցակներում նշուած չէ: Յուցակներից քա-

26 Թորոս Թորանեան, Չորք մարգպանցի հայ գիրի եւ մամուլի դէմքեր, Պէյրութ, 1987, էջ 100:

27 Տէն Սամուէլ Պոռանեան, նշ. աշխ., էջ 21:

ղուած տեղեկութեան համաձայն՝ գիտենք միայն, որ հին կառոյց է²⁸, ենթադրում ենք նաեւ, որ կոտորածներից առաջ եղել է կանգուն եւ գործող եկեղեցի:

Եկեղեցին եռախորան է, կոչում է նաեւ վերի եկեղեցի²⁹: Կառուցուել է հիշրայի 1267 թ. (1851-1852)³⁰:

Ս. Աստուածածին եկեղեցու կառուցումը կապուած է ԺԹ. դարի պատմական իրադարձութիւնների հետ, երբ Չորք-Մարգուանի աւագանին տեսնում է, որ ժողովուրդը գնալով բազմանում է, եւ կարիք է առաջանում կառուցելու նոր ու ընդարձակ մի ուխտատեղի³¹:

Օսմանեան կառավարութեան հետ առաջացած դժուարութիւնները յաղթահարելով՝ կառուցում է Ս. Աստուածածինը, որի գմբէթները բաւական բարձր էին եւ տեսանելի անգամ շատ հեռուից: Մեծութեան պատճառով հարեան թուրքերը եկեղեցին կոչել են Բեօյիք քիլիսէ (Մեծ եկեղեցի)³²:

Ս. Աստուածածինը քարաշէն է: Գմբէթը զարդարուած է վեցթեւեան խաչով, որի ներսի կողմում Արարչի իւղաներկ նկարն է, իսկ գմբէթից փոքր-ինչ վար՝ չորս սիւների կամարների վրայ, նկարուած են չորս Աւետարանիչները, Ոսկուայի պահն ու Գեթսեմանի պարտէզում Քրիստոսին ձերբակալելու տեսարանները³³:

Խորանի մէջտեղում նկարուած են վերջին դատաստանի մասին զգուշացնող երկու հրեշտակ: Պատերն ու ձեղունը ծածկուած են բուսական նախշերով: Սրբազան աւագանը զարդարում է Ս. Գրիգոր Լուսաւորչի խոշոր կտաւը, որը ինչպէս եւ եկեղեցու միւս բոլոր կտաւները, արուած է իւղաներկով³⁴:

Եկեղեցին կառուցուել է Տէր Մինասի օրոք՝ Արթին Քեհեայի, Հաճի Գէիւք Պալեանի, Սարգիս Գարավարդանեայի, Գարա-Սարգիս Գոճայեանի, Սարգիս Խըտըրեանի եւ ուրիշների անխոնջ նուիրումի շնորհիւ: Կառուցող վարպետներից յայտնի է Ռուբինեան Պարսամ ուստան³⁵:

Մասնակի նորոգութիւնները յաճախ իրականացում են առանձին անձանց կողմից, ովքեր այս կամ այն հիւանդութիւնից ազատուելու համար ուխտ են անում վերակառուցել սրբավայրը, նկար, խնկաման նուիրել: Երբեմն էլ

28 Տե՛ս «Էջմիածին», 1965, Ա., էջ 61:

29 Տե՛ս Սամուէլ Պողոսեան, նշ. աշխ., էջ 145:

30 Տե՛ս «Էջմիածին» 1965, Ա., էջ 61:

31 Տե՛ս Մինաս Գոճայեան, նշ. աշխ., էջ 142:

32 Տե՛ս անդ:

33 Անդ:

34 Տե՛ս անդ:

35 Անդ:

արդիկ, տեսած երագին հաւատալով, որեւէ նուիրատւութիւն են կատարում, մասնակցում եկեղեցու համար նախաձեռնած բարեկարգութեանը³⁶:

Ս. Աստուածածին եկեղեցու բակում կա երեք այլ շինութիւն եւս. դպրոց՝ կառուցուած Միացեալ ընկերութեան կողմից, մանկապարտեզ, որ կառուցուել էր ԺԹ. դարի առաջին կեսին, թաղական ու հոգաբարձուական մարմինների ժողովների համար նախատեսուած՝ երեք սենեակից բաղկացած շէնքը առաջնորդարանի, որի պաշտօնեաների իրաւասութիւնն է Չորք-Մարգուանի հայ բնակչութեան ներքին դատերը եւ վեճերը լուծել, ղեկավարել դպրոցական եւ եկեղեցական կեանքը³⁷:

Եկեղեցուց դէպի քաղաքի արեւելեան մաս, որը վերջանում է դաշտի մէջ³⁸, գտնւում է տեղի միակ արդիական կառուցուած շէնքը՝ երկյարկանի Քելեկեան որբանոցը:

Ինչպէս վերը տեսանք արդէն, Ս. Աստուածածին անունով եկեղեցի է գոյութիւն ունեցել նաեւ քաղաքին մօտակայ Էօզերլի գիւղում: Պատրիարքարանի ցուցակներից քաղուած տեղեկութեան համաձայն՝ գիտենք միայն, որ հին կառոյց է³⁹, ենթադրում ենք նաեւ՝ 1895-ի համիդեան կոտորածներից առաջ եղել է կանգուն եւ գործող եկեղեցի:

Ս. Գրիգոր Լուսաւորիչ (կամ Ս. Փրկիչ). Չորք-Մարգուան գաւառակում Ս. Գրիգոր Լուսաւորիչ անունամբ երկու եկեղեցի կայ: Առաջինը կառուցուել է Չորք-Մարգուան քաղաքում հիշրայի 1274 թ. (1857-1858), երկրորդը՝ Էօզերլիում, հիշրայի 1294 թ. (1877-1878)⁴⁰: Էօզերլիի եկեղեցուն կից գործել է նաեւ Ս. Փրկիչ անունամբ դպրոց⁴¹:

Թէպէտեւ Պատրիարքարանի կազմած ցուցակներում Չորք-Մարգուանի երկրորդ եկեղեցին կրում է Ս. Գրիգոր Լուսաւորիչ անունը, յուշագիրների մօտ յիշատակում է Ս. Խաչ կամ Ս. Փրկիչ անունով:

36 «Նիկ Մարգուան» վերնագրուած ձեռագիր, Քըրքխան, 1934, էջ 123, հեղինակը՝ անյայտ: Հետաքրքիր աշխատութիւն լինելով հանդերձ՝ չափազանց դժուարընթեռնելի է եւ կարիք ունի մանրակրկիտ ուսումնասիրութեան: Այս գրքոյկից որոշ էջեր թուայնացուած մեզ է փոխանցել Սիրանոյշ Մինասեանը, որին եւ յայտնում ենք մեր խորին շնորհակալութիւնը:

37 Ինչպէս տեսնում ենք դատավարութիւնների ընթացակարգի մասին Մինաս Խաչարիկի նկարագրութիւններից, Չորք Մարգուանը եղել է բաւականաչափ անկախ թուրքական իշխանութիւններից: Բացի ծանր ոճրագործութիւններից, մնացած բոլոր վեճերն ու տարակարծութիւնները լուծուել են տեղում՝ թաղային խորհրդի կողմից՝ առանց թուրքական իշխանութեան միջամտութեան. տե՛ս **Մինաս Խաչարիկ**, նշ. աշխ., էջ 34, 44:

38 Միջերկրական ծովից մինչեւ Ամանոսեան լեռների ստորոտ ձգուող այս դաշտը Չորք Մարգուանը բաժանում է Էօզերլի եւ Ղարաքիլիսայ գիւղերից:

39 Տե՛ս «Էջմիածին», 1965, Ա., էջ 61:

40 Անդ:

41 Տե՛ս **Osman Koker**, 100 yıl önce Türkiyede Ermeniler, Birzamanlar yayıncılık, İstanbul, 2005, էջ 243:

Կարծում ենք՝ եկեղեցին տեղացիները այնուամենայնիւ կոչել են Ս. Փրկիչ: Ըստ գրաւոր աղբիւրների՝ ծխատէր հոգեւորականները եւս բաշխուած են ըստ Ս. Աստուածածին եւ Ս. Փրկիչ եկեղեցիների⁴²:

Վերի եւ վարի թաղի եկեղեցիների անուան հարցում մէկ կարեւոր պարզաբանում ստանում ենք Աղանայի հայոց առաջնորդ Մուշեղ Ժ. վրդ. Սերոբեանի (1905-1909) ինքնակենսագրութիւնից⁴³: Մուշեղ վարդապետը, Չորք-Մարգուան կատարած իր այցելութեան առթիւ, ներկայ լինելով եկեղեցական ընտրութիւններին՝ երկու եկեղեցիները անուանում է Ս. Աստուածածին եւ Ս. Փրկիչ⁴⁴:

Այս տեղեկութիւնները կասկած չեն թողնում, որ Վարի թաղի եկեղեցին տեղացիներին ծանօթ է եղել Ս. Փրկիչ անուամբ:

Ս. Մինաս եւ Ս. Սարգիս. Այս մատուռի անուան եւ նրա գտնուելու վայրի վերաբերեալ կան հակասական տեղեկութիւններ: Գոճայեանը նշում է, որ մատուռն առանձնանում է բակի խարնուպ կոչուած ծառով: Մինաս Խապրիկը յիշատակում է Խարնուպլի ուխտավայրը՝ մատնանշելով նրա պահապան Ս. Մինասի անունը: Նոյն հեղինակը մէկ այլ հատուածում յիշատակում է Խարնուպլի կոչուած մի ուխտավայր, որտեղ ապրել է Ս. Սարգիսը⁴⁵:

Գերեզմանատանը կառուցուած մատուռի մասին Ս. Պռնանեանը գրում է. «Ս. Սարգիս եկեղեցին քաղաքի ամենահին կրօնական հաստատութիւնը լինելով՝ ձեռք է բերել ուխտատեղիի բնոյթ: Քաղաքացիները տօնական օրերին, խումն բազմութեամբ յաճախում են այս ուխտատեղին, մորթում մատաղներու կազմակերպում խրախճանք: Մեծ բազմութիւն է հաւաքում յատկապէս Տեառնընդառաջի տօնին»⁴⁶:

Մենք աւելի հակում ենք կարծելու՝ երրորդ եկեղեցին, որը գտնուել է գերեզմանատանը, կրել է Ս. Սարգիս անունը՝ յղում կատարելով այն մէջբերմանը, որ Չորք-Մարգուանի պահապան սուրբը եղել է Ս. Սարգիսը: Հակում ենք կարծելու նաեւ, որ Գոճայեանի նշած Ս. Մինաս մատուռը գտնուել է Օջաբլում, քանի որ Մինաս Խապրիկը վկայում է, որ Խարնուպլի կոչուածուխ-

42 Տե՛ս Մամուլ Պռնանեան, նշ. աշխ., էջ 147. Մինաս Գոճայեան, նշ. աշխ., էջ 147:

43 Տե՛ս Մուշեղ Սերոբեան, Ինքնակենսագրութիւն (անտիպ), տետրակ Բ., էջ 313: Այս տետրակից մի քանի թուայնացուած էջ մեզ է տրամադրել «Օսմանեան հայերու բնաշխարհը վերականգնելու ծրագիր» իրականացնող «Յուշամատեն» կայքի պատասխանատու խմբագիր Վահէ Թաշճեանը, ում յայտնում ենք մեր խորին երախտագիտութիւնը:

44 Անդ:

45 Տե՛ս Մինաս Խապրիկ, էջ 11, 56:

46 Տե՛ս Մամուլ Պռնանեան, նշ. աշխ., էջ 129, 146:

տավայրում երիտասարդները ծառից կախում էին թաշկինակներ՝ Ս. Մինասի բարեխօսութեամբ երազանքները ի կատար ածուելու հաւատքով⁴⁷:

Աւետարանական ժողովարան. Չորք-Մարգուանի հայութեան՝ Հայ Եկեղեցու եւ ազգային ասանդութիւնների հանդէպ ունեցած նախանձախնդրութեան մասին վկայող փաստ կարելի է համարել յարանուանական եկեղեցիների հանդէպ ցուցաբերուող վերաբերմունքը. հայ կաթողիկ համայնք գոյութիւն չունի առ հասարակ:

Ինչ վերաբերում է ավետարանականներին, համայնքը հաւաքում էր չորք-մարգուանցի Դելի Գէորգեան Խաչերի բնակարանում: Աւելի ուշ, դաւանափոխ Նազարէթ Մագասճեանը սեփական պարտեզում բացում է երկրորդ ժողովարանը: Առաջին հարկը կառուցում է, սակայն խիստ բողոքի պատճառով կառավարութիւնը դադարեցնում է շինարարական աշխատանքները: Վերջապէս, պատուելի Սարգիս Թորեանի միջամտութեամբ եւ ջանքերով աւարտում են ժողովարանի շինարարական աշխատանքները⁴⁸:

Այս ժողովարանը գտնուում է Չորք-Մարգուանի Վերի թաղում⁴⁹: Աւետարանական համայնքի երկրորդ ժողովարանը գտնուել է Էօզերլիում:

Ս. Գէորգ ուխտավայր. Չորք-մարգուանցիների յաջորդ սրբավայրը Ս. Գէորգն է, որը գտնուում է Եղջերնուտ կոչուող լանջի վրայ՝ քաղաքի հիւսիսային մասում: Այն չորս պատերն ու խորանը տակաւին կանգուն եկեղեցի է: Մեծ մայրերը պատմում են, որ եթէ անհրաժեշտ է լինում, Ս. Գէորգն իր առասպելական ու հրաշագործ նիզակով այս եղջիւրները նետի է վերածում ու տեղում գտնում Պերեքէթ լեռան ասպակներին⁵⁰:

Ս. Սարգիսի Քար. Հինաւորց Ս. Սարգիս կրօնական հաստատութիւնից բացի, Չորք-Մարգուանում պայտի ձեւ ունեցող մի ժայռաքար կայ, որի մասին բերնէբերան փոխանցուած ասանդոյթը այս կերպ է հասել մեզ. Բիզանդական կայսրից փախուստի է դիմում Ս. Սարգիսը՝ ձիւ վրայ տանելով նաեւ իր Մարտիրոս որդուն, կամ մէկ այլ ասանդութեան համաձայն՝ կայսեր դստերը, ով փրկել էր իրեն մահից⁵¹: Փախուստի ճանապարհը անցնելիս է եղել Չորք-Մարգուան բերդաքաղաքով, իսկ Ս. Սարգիս սպիտակ ձիւ պայտը սրընթաց արշաւի ժամանակ հետք է թողել մի սեւ քարի վրայ:

Տեղացիները, հարեւան բնակավայրերի երիտասարդները, հաւատալով քարի մէջ ջուր լցնելու, խմելու եւ առողջանալու հրաշագործութեանը, մեծ

47 Տե՛ս անդ, էջ 56:

48 Տե՛ս Սամուէլ Պոռանեան, նշ. աշխ., էջ 155:

49 Տե՛ս Մինաս Խապրիկ, նշ. աշխ., էջ 28:

50 Տե՛ս Մինաս Գոճայեան, նշ. աշխ., էջ 37:

51 Անդ:

բազմութեամբ գալիս են Կոյր Զրադաց կոչուած բլրի, ծեր եղջերէնու տակ գտնուող Ս. Սարգսի քարին ուխտի: Մեծ բազմութիւն է հաւաքուում յատկապէս սրբի տօնին: Ընդունուած սովորոյթի համաձայն՝ այդ օրը մատաղ են անում, աքլորի կամ ոչխարի մտով եփած նոխսուտլու պուլղուր փիլաւ (սիսեռով ձաւարի փլաւ) պատրաստում⁵²:

Յիշատակենք Ս. Սարգսի Քարի գործած հրաշքներից մէկը՝ ըստ Մինաս Գոճայեան յուշագրի. Երկու թուրք զինուոր գիշերը սրբավայրի մօտով անցնելիս նկատում են դրա մօտակայքում աճած հսկայական մրտէնին՝ վրան կապկպած կերպասի զանազան կտորներ: Զինուորները կռահելով, որ քրիստոնէական սրբավայրի մօտով են անցնում՝ որոշում են պղծել այն: Մէկը իջնում է փոսը ու աղտոտում այնտեղ, սակայն նոյն վայրկեանին իսկ անշարժանում, քարանում է: Միւս զինուորը ձիավարում է զօրանոց ու օգնութիւն կանչում: Այստեղ եկած հրամանատարը կարգադրում է անմիջապէս մաքրել փոսը, ապա ջուր լցնել ու երեք անգամ խմեցնել զինուորին: Ականատեսները պատմում են, որ հրամանատարի պահանջը կատարելուց յետոյ Ս. Սարգսից զարնուած զինուորը բուժում է:

Ասար Դեղէի սրբավայրը. Եղջերնուտ կոչուած բլրի հարաւային կողմում է գտնում մէկ այլ սրբավայր, որին թէ՛ հայերը եւ թէ՛ թուրքերը վերաբերում են ակնածանքով⁵³: Ասար Դեղէի սրբավայրը եւս փլատակ եկեղեցի է, որի ներսում կայ մի ակ: Տեղացիները հաւատում են, որ երաշտի ժամանակ աղօթքներով նետած քարերը կարող են անձրեւ բերել⁵⁴:

Քիլիսեջիք (Քարաքիլիսայ). Քաղաքի հարաւարեւելեան կողմում՝ երկու ժամ հեռավորութեան վրայ գտնում է Քիլիսեջիք կամ Քարաքիլիսայ կոչուող վանքի աւերակը, որի շուրջը աւերուած բնակավայրի մնացորդները դեռեւս տեսանելի են⁵⁵: Այս սրբավայրին առընթեր գտնում է Քարավանքը անուամբ թուրքական գիւղը: Այլ տեղեկութիւն այս սրբավայրի մասին մեզ չի հասել:

52 Տե՛ս անդ:

53 Անդ:

54 Տե՛ս Անդ:

55 Տե՛ս Սամուէլ Պոռանեան, նշ. աշխ., էջ 21:

SUMMARY

The province Chker is one of the settlements in Cilician Armenia where there are a lot of churches. Chork-Marzvan being one of the provinces populated with Armenians, had numerous churches and monasteries, which have never been as a subject of research. In the XIX century many of these sanctuaries were in ruins, and became pilgrimages. The aim of this article is to gather up Chork-Marzvan pilgrimages and make the number and names of the churches more precise. On the basis of three unprinted sources as well as many other printed sources and memoirs referring to Chork-Marzvan.

РЕЗЮМЕ

Провинция «Чкэр» - богатое церквями селение, находящееся на территории Киликийской Армении. Один из районов провинции, «Чорк-Марзван», имеющий густое армянское население, известен своими многочисленными церквями и монастырями, которые никогда не становились предметом изучения. В 19 веке большая часть этих святынь уже стала руинами и считалась местом паломничества. Основываясь на трех рукописных первоисточниках и на иных источниках, посвященных «Чорк-Марзвану», а также на напечатанные воспоминания о памятнике, в настоящей статье сделана попытка обобщить места паломничества «Чорк-Марзван», а также сделать некоторые уточнения в связи с количеством церквей и их названий.